

歸綏識畧卷十二

地部

崞縣張 曾小袁初輯

義學

古豐義學創始無所考嘉慶八年長白德公綸以吏部郎中簡任歸綏道念義學廢弛日久乃自損廉俸於署內西北隅重建學舍一所中楹奉至聖先師神位東西各五楹為生徒肄業所時歸化同知西理納綏遠同知塔清阿和林格爾通判繼昌薩拉齊通判札勒罕清水河通判伊克坦布托克托城通判善寶綏遠庫大使周大鼎歸化巡檢葛瀛三薩拉齊巡檢程天麟等亦各輸廉俸共襄厥成於九年春延師主講考取生徒三十人入館受業立定條規每歲延兩師主講席月各奉脩脯銀十兩

學徒茶水每月銀三兩考課獎賞每季銀八九兩不等有督學使者陳方伯張及庫

大使周大鼎所撰碑記可考張周二託今無存德公又以需用頗多恐難經久因具稟撫憲

伯公議定歸廳歲捐銀五十兩綏和薩清托五廳歲各捐銀三十兩歸薩兩廳巡檢

歲各捐銀十兩其餘不敷銀兩由歸綏道自行捐足毫不派累商民並將條約碑文

刊發各廳其歲捐銀兩定期五月前解清以備支給十七年六月德公升任長蘆鹽

運使將却道篆復稟請署撫憲衡公札飭道屬查照原立章程永行遵辦經布政使

陳公遵批移至後任歸綏道嵩轉飭各屬存案交代是年十一月間嵩公因義學房

屋坍塌不堪棲止將學移住范家巷其條約仍遵前議造冊備查計開各廳同知通

判巡檢共捐銀二百二十兩義學兩師脩脯及生徒茶水每月需銀二十三兩每節

送學師禮銀各四兩每年三節需銀二十四兩每年連生徒獎賞等費約通共需銀

三百餘兩除捐銀外由本道補足二八月致祭先師孔子祭品猪羊等項俱本道備辦道光元年歸綏道岳任內因包頭鎮設立巡檢將薩拉齊巡檢應捐銀十兩自二年為始着兩巡檢分攤歲各捐銀五兩二十五年十月歸化城錢行總領並散戶等四十九家捐錢一千緡為義學膏火之需經護理歸綏道澍安府知府多公慧壽議以義學賃廡居住究非長策即將錢易銀四百兩價典本城西門外楊家巷路北房院一所正房三間有抱厦東廚房三間西廂房七間東南房三間西南房四間大門一間內除西套房三間原典主自占如蒙古原地主及原典主備價回贖即稟明歸綏道飭歸化廳驗收銀兩另行典買房院典約存案并行歸化廳

### 附德公告

為曉諭事竊以文明之治不擇地而興蒙養之方可因材而篤本道莅任茲土所見閭閻闡闡或以耕牧或以懋遷地廣人稠洵稱富庶顧學校未設人材無自而成爰倣古黨庠序之意立義學於衙署之後延師主講凡遠近之成人小子萃處而肄業焉惟濫而無節非所以示區別也今揆以生徒三十人為率其能識前言往行以蓄德者固將陶育以成國器即自幼學以至弱冠雖尚不曉文理而質性穎悟可習經書者皆在甄收之列為此出示瀛境人民知悉爾等有子弟願讀書者即赴轅報名候本道示期擇取三十名將姓名年歲籍貫注冊送館內受業毋許無故不到其經此番報名或因額滿不錄者即令附名冊後俟有空缺以次拔補至於文理明通之後諸生徒中有志上進各聽回本籍州縣應試庶幾人材興而風俗益臻醇焉是奉道所厚望者也特示

附陳希曾重立歸化城義學碑記

希曾字雪香號鍾溪江西新城人乾隆己酉解元癸丑以一甲第三人及第八詞順歷官至工部侍郎著有樸谷文草

我

國家誕敷文教學校如林自通都大邑以迄山陬海澨罔不蒸：向化家有塾黨有庠而國有學也即邊徼羈縻之地為自古聲教所未通者今亦野無匿秀人知向方往：以義名其學而或者限於地絀於財經始者未得其人繼起者未振其緒則其學亦終不立此固賴存心之公愛人之切疊：然全其始要其終而後其事以集其功以成歸化城為三晉藩衛觀察德公莅任有年所以通商惠工者成效已彰：矣而尤以興教勸學為先務舊有義學久廢不舉公亟謀更建之度地於道署之右捐廉為房更倡鳩工庀材不數月而告成屬予為文以記之且語予曰

地近官廨集生徒數十人其長者課以文藝勉之黜華崇實以敦品制行為大端其幼者與之繹經義課記誦并出絹素毫翰以鼓舞之或日一至焉或二三日一至焉樂此不為疲也予聞之喜曰此邦人士何幸得嘉惠儒林教學為先諄：如公者哉知化民成俗之必由於學也而以身先之知遜志時敏之厥修乃來也而以勤董之知入學考校離經辨志之不可凌節而施也而次第以及之知觀摩有自復震彼之苦其難而不知其益也而獎賞以誘之夫豈徒高其垣宏其宇為寒士謀棲遲之所哉蓋欲襍被而來者之實能相與有成也然則公之好學深思其存心之公愛人之切亦概可知矣予視學此邦凡使節所至靡不以先德行而後文藝為士子勗每進諸生於庭拳：懇：勉其所已能而掖其所未至蓋獎誘後進之思與公實有同心焉幸與公同事一方樂其心之相契而尤歎是舉之德施

於無窮也異日者化成俗美風聲所樹將見擔簦負笈者接踵而來斷然相與  
絃誦服習於其中吾知必有瑰奇特出之士個儻不羈之才出而宣揚邳治黼黻  
皇猷而歸本於振興庠序翕然稱公之德於不衰則公之培養士氣作育人材上副  
聖天子觀文成化之治者雖邊徼羈縻之地固無殊於通都大邑也予故樂為之書  
并為肄業者勗焉

按今世自各省會以至府廳州縣凡有學校之地莫不設立書院以培養人材  
猗與休哉何風之盛也至於義學之設或紳富樂善好施或鄉村公議建立俾  
寒家小戶無力延師者之子弟得就以資講習識之無地方人士自經理之守  
土者不與聞焉歸化城學校未立因無書院自前觀察德公設立義學五十餘  
年各官攤捐廉俸合力延師名為義學實則與書院同每歲兩學師脩脯亦與

尋常州縣書院山長不相上下口外無儒學各官每朔望講約輒以學師兼之  
亦所以廣教澤示尊重也惟凡事因循日久恐視為具文薪水未能以時講課  
必致輟業有名無實餼羊僅存揆諸前賢創始苦衷實相負之且邊塞周圍數  
千里所恃以移風易俗者祇此一區倘得推而廣之於各廳胥則倣焉將詩書  
絃誦之聲與犬吠雞鳴同相聞而達四境矣有心者尚共勗諸

奉使日記謂歸化城外番貿易蜂集蟻屯乃衝剽扼要之地控制之法良不可  
忽考之古碣元為豐州設知州同知判官各一員統於大同總府與宣慰使所  
轄今我

朝威德遐暢幅員之廣曠古未有即如臺灣遠在海外亦為郡縣應照此例將歸化  
城亦設為郡縣用府廳縣教官各一員以寄撫綏教化之澤設滿漢將軍一員

轄現在蒙古都統即金之置天德軍節度使元之立大同總府其意一也歸化一帶土廣人稀將死罪中有可矜矜免死之人發往開墾填實地方其新設郡縣各官照臺灣例三年升轉以致其奮庸之念

聖諭廣訓十六條中外文武臣民講讀乃化民成俗之本應令各官於朔望日齊集軍民一體講讀使知

聖化其軍民中有清秀子弟令教官教習漢書俟其通曉文義亦照臺灣設科取士之例人有進身之階不輟絃誦之音化魯朴為禮讓矣倭悍為忠義莫要於此十年生聚十年教訓更遐荒之區為冠裳之地增版宇而廣化育度越古帝王萬矣按記作於康熙二十七年厥後雍正五年都統丹津尚書通智奏請建立文廟設歸化城理事同知協理筆帖式後改設各廳理事通判增巡檢各官

乾隆二年以朔平府駐防將軍移駐綏遠城并裁減蒙古都統添設歸綏道一員統轄各廳俱與託意若合符節至所云開墾之說更無俟夫矜矜免死之人今遠近富厚農民且無不趨之若鶩利之所在天下歸之人情大抵如是惟學校至今未立致此間無土著之民每與當路設及仍有志未逮云尔